

Stroppiatempu

carac, espace compris : 5600

A m'avia ditta Nunzia, ci vulia ch'e scuntressi u nutariu Ghjaseppu Marfisi, ùn ci era chè eddu par tirà à u chjaru u me affari di tarrenu indivisu.

È fà è fà, è stu scontru ùn si facia mai, hè l'ultima tilifunata di Nunzia chì hà cambiata tuttu.

- L'aghju dittu chè tu vinarè à veda lu nanzi ch'eddu si n'andessi, u deci di sittembri... Allora sbrogliati par vena nanzi à stu ghjornu.

A so casa era in Cala Suttana è aghju dicisu di cudda mi ni sin' à Capu Biancu chì strapiumba u locu par fà calchì fotto cù u me strumentu cumpratu da pocu, di spuntinà culà è dopu, di rifalà par riunghja u pacciali di Cala Suttana.

A veghja aghju appruntatu u me matiriali è u lindumani, in fini di matinata, aghju presu a mottò, mi ci vulia à veda à Nunzia è cumprà mi i sigaretti.

- À chì ora vi videti ?

- Com'è tù m'ai dittu...à cinqui ori...

- Ma...ùn hè mancu meziornu !

- Prima, aghju da cudda in a punta par fà calchì fotto, quiddi di l'annu scorsu ùn n'erani micca riisciutti...

Cala Suttana era in pienu caldamonu. Aghju lacatu a motto vicinu à a funtana, aghju cacciatu u me pantalonu è missu un bermudà è i me scarpi grossi.

- Aveti da cuddà par sti calori ? mi lenta un omu sticchitu nant' à so piccula carrega, u so ghjurnali in mani.

- Sapeti quandu si codda si camineghja sottu à i frondi è culà in zù ci hè sempri un pocu d'aria...

A cuddata l'aghju fatta senza sforzu, c'era u caldu iè, ma mi socu ciuttatu u visu in u fiumiceddu. Dopu una bona ora socu ghjuntu in a punta, aghju dicisu di spuntinà subitu.

Ghjustu sottu à mè ci era un coppiu ch'avia finitu di spuntinà, erani ghjunti un pocu nanzi à mè è fighjulaiani amarvigliati u paisacciu. L'omu m'hà dumandatu l'ora, era americanu ma parlai bè francesu. Aghju presu u me tilifuninu è aghju risposu ch'eddu era esatamenti dui ori è mezu.

Mi firmaia à cuddà sin'à l'ultimi scoddi par avè una bella vista. Ghjustratu aghju ghjustratu ch'un ammaistrai micca bè u me novu strumentu è aghju persu pacienza dui o trè volti ma fattu aghju ciò ch'e vuliu. Erani dighjà quattru ori è mi ni socu rifalatu.

U caldu ci era à vera, avali, mi socu firmatu à mezu viaghju par rinfriscà mi, mi socu scalzatu, aghju cacciatu à me camisgetta è mi socu lampatu un pocu d'acqua addossu ...

Mi socu rimissu à marchjà è mi socu trovu di pettu à u coppiu d'americani ch'è ricuddaiani.

- Vous avez oublié quelque chose ?

- Non monsieur, nous montons au sommet...

Socu firmatu stunatu, l'omu ùn m'avia micca ricunnisciutu...

Ghjuntu à a me mottò, l'omu di a matina era sempri quì, pusendu annant'à a so carrega, lighjendu u so ghjurnali. Mi socu dittu : "U devi sapè a menti u ghjurnali...hè comu l'aghju lacatu à mezzornu...O allora pinciuleghja...

- Allora...ùn ci cuddeti più ?

- Ci socu cuddatu, rinvengu...

U tippu m'hà fighjulatu fendu un smimulu è sciuppendu l'ochja

Deci minuti dopu eru davanti à a casa di u nutariu. Ùn si sintia un zittu in u pacciali. Aghju pichjatu à a porta, una volta dui è trè è una boci trimulanti s'hè fatta senta. Aghju ricunnisciutu a boci di Fiffina, a serva.

A porta s'hè aparta è u visu invichjatu di Fiffina hè affaccatu, aghju vistu à u so aria ch'è ùn m'avia micca ricunnisciutu.

- Bonghjornu, socu Lisandru, Fiffina... Lisandru Bartoli....

- Ohimè, ohimè mancu ùn t'aghju rimissu Lisandru, veni à basgià mi...

- Aghju sempri in mimoria u sgaiuffu chì si liticaia cù tutti i ziteddi di u quartiere...

Mi socu missu à rida è ridia anch'edda... asciendu si i mani nant'à u so scusali par dà si una cuntanenza...

- Ma....comu hè chè tù veni avali ? A sa' ch'eddu faci a so siesta u Sgiò Marfisi ? Ùn aviami micca dittu cinqui ori ?

- S'è tù fighjuli bè, ùn saremu tantu luntani di i cinqui ori... li rispondu.

Bulighendu in a me stacca aviu surtitu u me tilifuninu : u screnu marcaia dui ori è mezu... So firmatu stantaratu...bocca aparta è ochji sciuppati.

- Sè sempri statu in a luna o Lisà...Ben sicura chè so dui ori è mezu è micca cinqui ! Ohimè ohimè....

Ùn diciu nudda, eru sbambulitu...rifaciu u traghjettu di u ghjornu... Quando l'Américanu m'avìa dumandatu l'ora era erani dui ori è mezu. Aghju fattu dopu i me fotto duranti omancu un antra ora, faci trè ora è mezu... Ùn pudemu micca essa nanzi à quattr'ora è mezu o cinqui ori...È u tilifuninu mi dà a stessa ora chè culà in sù...

Mi socu strascinat u daretu à Fiffina. Par travirsà a casa è andà da l'altra parti, induva ci era un pocu di friscura. Aghju cuntatu l'affari davanti una tazza di caffè è un bichjeri d'acqua fresca. Quando aghju parlatu di u fiumiceddu, Fiffina m'hà dumandatu :

- Fiumiceddi ci n'hè trè, dui minori minori chì devini essa guasgi à seccu par sti calori è unu più maiò...à mez'à i dui... ùn hè vera ?

- Iè i dui erani guasgi à seccu, hè vera...mi socu rinfriscatu in u maiò, ma ùn mi socu micca stanciatu, mi socu solamenti rinfriscatu un capu è i braccia...L'acqua era più fretta chè u ghjacciu....

- Quando i dui ùn ani più acqua, u maiò ingrossa è tantu à so acqua duventa chjara è fresca. Stu fiumiceddu si chjama "U stroppiatempu". T'hà a facultà d'allungà o di taddà u tempu...ùn ci voli micca à tuccà a so acqua...

- Comu ? Ùn capiscu nudda...

- Ùn ci hè nudda à capiscia, sò vinuti dui prufessori da u cuntinenti quandu eru zitedda par studià l'affari, ci hè statu ancu un articulu in u ghjurnali...Diciani ch'edda era parchì sott'à u fiumiceddu c'era una sfilatura prunfunda chì fala sin'à l'infondu di a tarra...Un'affari cusì....

- Ma allora...chì s'hè passatu ?

- Pinsaiu chè tu avii u capu in i stelli... Innò u to capu hè à l'infondu di a Tarra....induva ci sò stelli ancu più numarosi...Ùn ci voli micca à tucca l'acqua maldetta lu me tisoru ! U meddu hè di tena ti à sti stilluchji chè tù ai in capu... Creda mi...